

Wallafigrecht vff ein

ander form / da man dem Schultheissen
keine besondere freie Richter zugibt / sondern da
man von gemeinem Volck Befelchhaber vnd
Hauptleut / sampt der Fenreich selbst darzu
braucht.

Drhero eine Kundtschafft / so ein Schultheiß einen guten Gesellen zuuerhören schuldig ist / als nemlich / So soll allewege ein Schultheiß in beysein hernach gemelter Erbarer vnd Mannhafftiger Personen / beyde Partheien für Recht bescheiden / vnd alle verbrechung oder Mißthat / was ein jeder gethan vnd begangen hat / den rechter grundt erfragen vnd verkundtschafften / so kan man darnach mit guttem gewissen recht richten vnd Brtheilen / dann es muß straff vñ zwang seyn / darumb mag die Oberkeit wol zusehen / auff mutwillige Tüben / vnd nit zuviel gestatten / oder den Zaum zu lang lassen / dann GDE wirts scharff vnd genaw bey ihnen wieder suchen.

Wiederumb dargegen mögen die Hauptleut vnd Befelchhaber auch gedenccken / daß sie nit etwan einen armen vnuerständigen Kriegsmann auß haß vnd neide verrathen / verklagen / vnd zum todt verurtheilen / vnd einen andern Galgenvoagel vmb geckerey willen loß bitten / der den Hals zwey oder dreyfach verbürt hat: Dañ es ist kein gering ding einem guten Gesellen Leib vnd leben absprechen / wie dann offft geschicht / daß die Befelchhaber dem Hauptman zugefallen / vnd die gemeine Kriegsleute nit widder die Befelchhaber / vnd widder die Obrigkeit thun dörfen / sonder blasen in ein Horn zuhauff / dar durch manchem zu kurz geschicht. Die solches thun / die verurtheilen nit den / der allhier nach ihrem willen an leib vnd leben gestrafft wirdt / sondern sie verurtheilen iren eigen Hals vnd Seele in abgrundi der Höllen / zum ewigen verdammuß / Dañ einer der Laster verschweiget / vnd verbirgt vnrecht gut / vnd einer der falsch vrtheil spricht / die werden beyde zugleich in einem Bade baden. In summa / so einem Kriegsmann gewalt oder vnrecht von den Befelchhabern geschicht / vnd er es anders beweisen / oder mit seinem Ende erhalten kan / ob gleich ein mordt darauß erfolget / daß betrifft kein Hals verbrechung.

Darumb